

四庫全書

史部

欽定四庫全書

唐大詔令集卷九

宋 宋敏求 編

帝王

冊尊號赦上

開元二十七年冊尊號赦

天寶七載冊尊號赦

天寶八載冊尊號赦

天寶十三載冊尊號赦

乾元元年冊太上皇尊號赦

廣德元年冊尊號赦

冊尊號赦上

開元二十七年冊尊號赦

勅古之執大象建皇極者必籍彛訓而受鴻名所以應  
乎天而順乎人也朕嗣守丕業二十七年受命之初既  
膺明號尚多祗懼已謂崇高公卿宗子緇黃耆艾披誠

憑懇詣闕上言僉以為乃聖乃文祖宗大業恭惟績服  
必在欽承顧以休名施於薄德抑而不許凡已十年爰  
追於今又陳八請上迫奉先之義下稽從衆之言將存  
至公不可固拒以今日敬依大號曰開元聖文武皇  
帝勉從典冊良增感懼維新之號既不私於朕躬非常  
之澤宜普覃於率土可大赦天下自開元二十七年二  
月七日勝牒昧爽已前大辟罪已下罪無輕重已發覺  
未發覺已結正未結正繫囚見徒常赦所不免者咸赦

除之自開元以來諸色逋負痕累人等咸從洗滌令許  
自新所司更不須以此為累其有別勅停官及亡失爵  
者放歸不齒之類量加叙恤左遷官及諸色流人並稍  
量移近處朕每念黎甿常恐失所求其困乏必在及時  
比來諸州或有損處所在賑給例逼春農比及奏報又  
淹時月既無救於懸絕亦何成於惠養自今以後每年  
至秋收後即宜遣使分道宣慰仍與採訪使及州縣相  
知巡檢百姓間或有乏絕不自支濟者應須蠲放及賑

給便量事處置訖奏聞天下百姓宜放今年地稅古者  
三載考績黜陟幽明允叶大猷以勸天下比來諸道所  
通善狀但優仕進之輩與為調選之資責實循名或乖  
古義自今以後諸道使更不須通善狀每至三年朕當  
自擇使臣觀察風俗有清白政理著聞者當別擢用宗  
廟致敬必先於如在神人所依無取於非族深惟至理  
用切因心其應緣太廟五享宜於宗子及嗣郡王中揀  
有德望者令攝三公行事其異姓官吏不須令攝其草

澤間有殊才異行文堪經國為衆所推如不求聞達者  
所由州長官以禮徵送皇太子璵男宜並封授官邵王  
守禮寧王憲各與一子三品官其内外文武三品以上  
賜爵一級四品以下各加一階長公主及嗣郡王各與  
一子官郡主縣主各放一子出身二王後及諸方蕃客  
宜各賜物諸致仕官量與進改依前致仕天下耆老百  
歲已下版授下州刺史婦人版授郡君賜粟五石綿帛  
五段九十已上版授上州司馬婦人版授縣君賜粟三

石綿帛三段八十以上版授縣令婦人版授鄉君賜粟  
兩石綿帛兩段京城父老等宜共賜物三千段僧道等  
賜物一萬匹天下觀寺每六齋日宜轉讀經典懲惡勸  
善以闡大教率土之內賜酺三日

天寶七載冊尊號赦

惟天法道惟后奉天既合德以降符必執象以明本則  
上玄眷命有以丕承大寶鴻名斯為公義朕纘宗社之  
重揚文武之烈克勤匪懈服道齊心允迪茲猷聿求至



理日慎一日三紀於茲屬區夏太寧靈祇集貺而公卿  
宗子耆艾法流僉曰玉芝白魚神日瑞景天之應也敦  
信興禮務本宗儒人之應也化洽而風俗休寧氣和而  
疵厲不作天啟道運不可讓也上荅元符願增徽號披  
誠詣闕累上封章至請逾勤懇詞難奪以今日敬膺典冊  
曰開元天寶聖文神武應道皇帝式副人神感懼交集  
宜廣恩於善貸俾叶度於維新可大赦天下自天寶七  
載五月十三日昧爽已前大辟罪已下罪無輕重已發

覺未發覺已結正未結正繫因見徒常赦所不免者咸  
赦除之其左降官及流移配隸安置罰鎮効力之類並  
稍與量移亡官失爵放歸不齒及諸色被停與替非衰  
老疾病者宜所司量加收叙人和年登休運斯屬輕徭  
省賦惠政攸先將洽小康必弘厚貸其天下百姓來載  
租庸並宜放免及諸色勾徵等亦一切放免自古帝王  
建邦受命必敬先代以修舊章周備禮文既存三恪之  
位漢從損益惟立二王之後自茲已降且復因循將廣

繼絕之恩式弘復古之道宜於後魏子孫中簡擇諸屬  
灼然相承者一人委所司勘實淮鄒公介公例定為三  
恪陵廟所奉典職維宗事雖更於有司任豈循於恒秩  
其宗正卿與太常卿同品其少卿及丞亦宜准此又上  
古之君存諸號氏雖事先書契而道著皇王緬懷厥初  
寧忘咸秩其三皇以前帝王宜於京城共置一廟仍與  
三皇五帝廟相近以時致祭自古受統之主創業之君  
皆經濟艱難戡定禍亂雖道謝於往古乃功施於生人

用率典章亦崇禋祀其歷代帝王發跡之處未有祠宇者宜令所由郡縣置一廟以時享祭仍取當時將相德業可稱者二人配祭仍並以圖畫立像如先有祠宇未霑享祭者亦宜准此式間表墓追賢紀善事有勸於當時義無隔於異代其忠臣義士孝婦烈女史籍所載德行彌高者所在亦置一祠宇量事致祭古者鄉有塾黨有序所以明尊卑之儀正長幼之序風化之道義在於茲先置鄉學務令敦勸如聞郡縣之間不時訓誘閭巷

之內多虧禮節致使言詞鄙褻少長相凌有點清猷何  
成雅俗自今以後宜令郡縣長官申明條式切加訓導  
如有禮儀興行及綱紀不立者委採訪使明為褒貶具  
狀聞奏道教之設風俗之源必在弘門以敦風俗須列  
四經之科冠九流之首雖及門求道頗有其人而覩與  
窮微罕聞達者豈專精難就為勸獎未弘天下諸色人  
中有通明道德經及南華等四經任於所在自舉各委  
長官考試申送其宗玄生出身自今以後每至選量減

於常例一選以為留放朕每以道元有屬思竭精誠經  
教所存豈忘崇奉且從其道者師其人行其教者尊其  
禮晉瑯琊王公府舍人楊真人護軍長史許真人丹陽  
上計掾許真人皆道著妙門感通玄闕降高真之跡為  
上清之宗後漢張天師教達元和德宗太一正一之道幽  
贊生靈梁中散大夫貞白陶先生高尚塵表博達玄微  
綜緝真經傳裨後學並令有司審定子孫將有封植以  
隆真嗣天師冊為太師貞白冊贈太保其天下有洞宮

山各置天壇祠宇每處度道士五人并取近山三十戶蠲免租稅差科永供灑掃諸郡有自古得道昇仙之處雖令醮祭猶慮未周宜每處度道士三人其靈迹殊尤功應遠大者度三人永修香火其茅山紫陽觀取側近百姓二百戶太平崇元二觀各一百戶並蠲免租稅差科長充修葺洒掃應天下靈山仙迹並宜禁斷樵採弋獵如聞山林學道之士每被搜尋且法之防邪本有所以至於宿宵妖訛亡命聚衆誘陷愚人故令禁斷郡縣

遂一槩迫逐至學道者不得安居自今以後審知清潔  
更不得恐動以廢修行其五岳四瀆名山大川各令本  
郡長官致祭朕刻意真經虔誠至道冀憑玄佑永錫黔  
黎每朝禮三清則宵衣忘寢或齋戒一室則蔬食屬厭  
不以勤躬為倦務以徇物為心況於宰殺尤加惻隱自  
今以後天下每月十齋日不得輒有宰殺聞閭閻之間  
例有私社皆殺生命以資宴集仁者之心有所不忍亦  
宜禁斷且因親設教式本於人倫自葉流根必逮於榮



養内外文武職事官有五品已上其父祖見在而無官者各授一官仍聽致仕其祖母見在准母例處分京官五品已上正貲官如父母已歿未有官者亦宜追贈所司勘會即與處分睦親之義因心不忘前開府儀同三司竇瑊頃以容納微人頗虧典憲永懷舅氏追感渭陽宜申國恩再復榮秩可開府儀同三司仍放優閑不須朝會王澤無私豈殊於中外天瑞有慶頻屬於京輦寬大之典則已溥覃惠施之恩特申曲被其京城父老宜

各賜物十段七十以上仍授本縣令其妻版授縣君六十已上版授本縣丞天下侍老百歲已上版授上郡太守婦人版授郡君九十已上版授上郡司馬婦人版授縣君八十已上版授縣令婦人版授鄉君仍並量賜酒麵內外見任文武官九品已上宜各賜勲兩轉其京文武官見在京及致仕並陪位官諸方通表使及月番官等一品賜物一百匹二品三品並八十匹四品五品五十匹六品七品三十匹八品九品二十段兩京留守各

八十匹其節度使採訪使并諸官稱充使未迴並同在  
京例賜物貴妃楊氏稟性柔和因心忠孝克恭克慎蹈  
禮循詩加以勤志玄宗叶成嚴奉率勵宮掖以迪闕睢  
宜賜物三千匹嬪御等賜物有差太真觀雖先度人住  
持尚少宜更度道士七人太子璵賜物二千匹慶王琮  
已下各有差率土之內賜酺三日

天寶八載冊尊號赦

自昔皇王受祚必降於元符天人協心乃章於大號朕

續承玄緒虔奉睿圖何嘗不精意真宗勵心庶政幸以  
邊隅底定風雨時若人和歲稔且洽於雍熙極瑞殊祥  
荐臻於昭應故得玉芝再產秘牒玄通斯皆至道降休  
先聖儲祉菲德曷以克當是用祇薦崇名永揚鴻烈而  
羣公百辟援義比事誠請不已固辭不獲以今日敬膺  
典冊曰開元天地大寶聖文神武應道皇帝徽章載茂  
寅畏增深宜因稽古之典式布維新之澤可大赦天下  
自天寶八載閏六月五日昧爽已前大辟罪已下罪無

輕重已發覺未發覺已結正未結正繫囚見徒常赦所不免者咸赦除之朕永惟風俗之本漸興返樸至於弘貸之名亦思復古天下百姓丈夫為戶頭者宜各賜爵一級征鎮之役其來自久雖存素備諒在變通頃者用兵蓋非獲已今西戎摧殄北敵歸降南蠻東夷咸皆稽顙亦可謂四海無事萬里廓清減戍息人思弘善貸其諸軍鎮兵非切要可均減者宜令本道節度與所司商量處置聞奏其百姓有頻經征鎮者已後差點之次不在

取限高年給侍本屬存養因時定式務廣仁恩其天下  
百姓丈夫七十五已上婦人七十已上宜各給中男一  
人充侍仍任自簡擇至八十已上依常式處分唐虞省刑  
畫冠不犯秦漢制法密網唯煩理亂之間得失斯在朕  
長想遠古務崇敦樸刑期不濫政叶無為豈惟守於平  
邦庶有臻於大道頃者詳諸條目已從簡易至於結斷  
尚慮深刻所貴從寬示其知禁宜令中書門下與刑部  
大理法官審更詳定法律之間有所非便者具條目奏

禘祫之禮以存序位質文之變蓋取隨時國家系本仙  
宗業承聖祖重熙累盛既錫無疆之休合享祭神宜弘  
不易之典自今每遇禘祫並於太清宮聖祖前設位序  
正上以明陟配之禮欽若玄宗下以盡虔恭之誠無違  
至道比來每緣禘祫時享則停事雖通於從宜禮或虧  
於必備自今已後每緣禘祫其時享無廢又奉先追遠  
禮惟昭德崇福展敬義在因心自今已後獻祖宣皇帝  
宣莊皇后忌日宜令京城一日設齋太祖景皇帝景烈皇

后代祖元皇帝元貞皇后忌日京城三日行道玄宗妙  
本實備微言垂範傳學時宏至化朕所以發求道之使  
遠令搜訪因聽政之餘親加尋閱既刊謄謬爰正簡編  
必在闡揚以敦風教今內出一切道經宜令崇玄館即  
繕寫分送諸道採訪使令管內諸郡轉寫其官本便留  
採訪郡太一觀持讀聖人垂訓蓋先乎道學者崇本必  
有其師文宣王與聖祖同時俱為教首雖考言比德理  
在難明而問經序禮跡彰親授思廣在三之義用崇得



一之尊宜於太清太微宮聖祖前更立文宣王像與四真人列侍左右且道降真符天有成命藏之於密則取固名山彰之以類則發祥星洞况靈仙所集宜表殊休太白山可封為神應公所由時祭祀其金星洞改為嘉祥洞所管華陽縣改為真符縣仍於洞所置一祠宇仙人臺下置一觀兩京并十道於一大郡亦宜各置一觀仍並以真符王芝為名每觀度道士七人修持香火戶部侍郎兼御史中丞王珙以才受委以忠奉上頃命精

求玄論克叶神心宜旌迺誠俾正章綬特與三品其李  
渾等四人既親傳真誥因獲元符當有甄明用旌福應  
宜令中書門下量其所能具狀聞奏當別處分夫九州  
之鎮實著禮經三代之典必崇望秩事既屬於報功義  
有弘於錫命其九州鎮山除入諸岳外宜並封公仍各  
置祠宇如先有祠宇者量更增修以時致祭其五岳四  
瀆雖載常祀儲慶發祥當申昭報宜令所在長官各陳  
祭禮名山大川亦量事致祭天下侍老並量賜酒麵內

外見任文武官職事官三品已上賜爵一級四品已下各加一階其京文武官見在居京諸色陪位官通表使等賜帛有差率土之內賜酺三日

天寶十三載冊尊號赦

王者事天明事地察修身慎行孝德彰矣故風化天下和睦興焉致敬宗廟祖考來格是則禮莫大於嚴享孝莫大於揚名有以通於神明有以光於四海朕承真之道續聖之業欽若先訓惟懷永圖寶儉寶慈無為而理

自南自北有截來威五教聿興家服仁孝四靈感應物  
必純誠百郡公卿萬方夷夏僉奉玄貺徵長發於真源  
屢薦鴻名願昭彰於至德封章守闕至于再三加以聖  
祖錫符玄中啓迪天心垂裕榮光降臨敢不丕承固執  
冲讓乃展因心之義以弘推尊之典虔上册禮齋肅思  
誠入室儼然敢忘於目出戶而聽庶幾有聞揚美謚於  
無疆展永懷於罔極典從拜後禮既尊先式副羣心允  
成古義岑今日敬膺典冊曰開元天地大寶聖文神武證

道孝德皇帝大號載宗祇若增懼宜因布和之時式弘  
在宥之澤可大赦天下自天寶十三載二月九日昧爽  
已前大辟罪已下罪無輕重已發覺未發覺已結正未  
結正繫囚見徒常赦所不免者咸赦除之官人犯入已  
贓不可更令却上後不須為累其左降官並稍量移  
近處其反逆緣坐流配諸色宜與量移其王珙李林甫  
柴崇耀阿布思等並寄任非輕包藏特甚原情議法深  
所難容況日月未淹罪坐尤重即從寬宥何以懲肅應

緣親累流配者並不在該及之限左降官承前遭憂皆不得離任孝行之道所未弘通情禮之間深可哀恤如有此類宜並放歸仍申省計至服滿之日准法處分自今以後編入常式其中有非反逆緣坐及情理切害有父母老年不任相隨無昆弟養者許停官歸侍及有鳧衰老先罹譴責情願停官者委本道採訪簡擇具名牒中書門下然後放還鰥寡惻獨乏絕者量加賑給三載黜陟百王令典殿最之迹廉問攸歸欲更別遣使臣慮

有煩擾今歲宜委本道採訪使具官人善惡奏聞以申  
勸沮自臨御以來四十餘年棧樸延想寤寐求賢林藪  
無遺旌招不絕猶慮昇平已久學業增多至於徵求或  
遺僻陋其博通墳典洞曉玄經清白著聞詞藻宏麗軍  
謀出衆武藝絕倫者任於所在自舉仍委郡縣長官精  
加詮擇必取才實相副者奏聞朕宗尊先謚霜露增感  
於以孝思無忘錫類其內外見任官階俱是三品已上  
父未有五品官及無官已亡歿者宜各贈五品及母無

邑號者亦與追贈其見任四品五品清官官階是五品  
已上者亡父母先無官號者亦准此追贈且厚其風俗  
五教之旨聿興貢於丘園十翼之風斯在其士庶間有  
衆推孝悌累代義居高尚確然隱遁巖穴者委採訪使  
博聞訪薦其孝義之人已經旌表雍睦無易純至有終  
著美鄉閭深可嘉尚各賜勲兩轉以彰德行天下侍老  
百歲已上版授本郡太守婦人版授郡夫人各賜綿帛  
五段粟三石八十已上版授縣令婦人版授縣君令各



賜帛兩段粟兩石太清宮闕聖賢仙居頻降休徵屢貽啟  
迪不有優異豈表殊常其本宮道士宜各賜物三十段  
道門威儀王虛貞賜物五十段陪位大德各賜物二十  
段因心推崇增上美謚惟官統職必在正名今以太常  
尊事宗廟安可列署為名禮不逼尊情期達敬五陵署改  
為臺其獻陵臺等五令及丞並昇一階以彰崇奉五岳  
四瀆及名山大川并靈迹之處先賢祠廟各委郡縣長  
官致祭其有陵墓祠宇頽毀者量事修葺亞獻皇太子

賜物一千段終獻榮王琬賜物五百段其餘各賜階爵  
有差其郡守縣令職在親人必務公勤用康黎庶凡所  
推擇皆竭乃誠寵錫之間須甄異等普恩之外太守等  
並賜爵一級縣令賜勲兩轉庶期勉勵以表朕心其京  
文武官一品賜物一百匹二品八十匹三品七十匹四  
品五品五十匹六品七品各三十匹八品九品各二十  
匹東京北京留守節度採訪使並京官准勅出使未回  
者所賜物並同見在例左相陳希烈純粹之道載穆朝

廷文儒之風式瞻師表且叶和時令翊贊昇平柔嘉其德克壯元老與一子五品官賜物五百匹攝太尉奠瓚上冊書寶冊讀冊右相楊國忠當朝正色百寮紀綱勵節遺身三階柱石況發揮孝理潤色鴻猷金玉王度典禮增緝不有殊等何用為勸宜與一子三品仍與一子五品官更賜物五百段左僕射安祿山以貞一之心搃文武之任出清北落入贊南宮既押登歌又揮寶冊與一子官賜物四百匹攝太尉張均太清宮祠及修儀注

等使普恩之外又賜物一百匹武德功臣貞觀初宰輔  
等緬想忠義感會風雲用集大勲肇興王業其有子孫  
零落冠冕陵夷無任官者宜令所司勘責依資與一人  
京官唐初功臣績叅締構錄勞念舊每寘於懷普恩之  
外宜放一子出身如已出身所司依資與一官率土之  
內賜酺三日

乾元元年冊太上皇尊號赦

古者父有天下傳歸於子子有天下尊歸於父有國所

以繼統立身莫若揚親其義遠矣我太上至道聖  
皇天帝惟皇降衷敷佑於上允文允武乃聖乃神道合  
乎乾坤德明乎日月粵若增崇九廟巡謁五陵天子之  
孝也嚴裡二郊升中東嶽聖人之表也制禮作樂闡學  
明刑帝皇之業也勘定多難懷柔百蠻霸王之功也於  
是乎為而不宰成而勿居神超象外之光心契合漠之  
境釋負于小子俾承於丕構討伐叛逆綏懷四方豈朕  
之能皆聖皇之訓也頃者親授寶符載錫美稱顧朕不

德何以克荷君父之命若登於天祖宗之緒恐墜於地  
一昨與羣公百僚庶尹衆士圖惟帝載欽若聖謩自古  
以來百王垂統文明濬哲孝友寬仁豈有如我開元之  
盛也乃稽大典上徽號曰太上至道聖皇天帝累日陳  
請不蒙許納至於數四今茲俯從允膺天休克副人望  
朕迫嚴旨曲被殊私迎春之初承奉嘉命聖皇所賜曰  
光天文武大聖廣孝皇帝名以制義亦為實賔卑不踰  
尊是昭物則恭惟聖造何敢當仁初以洪業載昌有虧

公議復以大聖二字深稽皇猷讓非飾詞言必形泣承順顏  
色而宸睟不回祇膺寵光乃夕惕增勵今惟新景命禮  
洽於尊親誕受徽章敬在於順上發生萬物行慶其時  
孚佑兆人緩刑斯在宜弘沛澤以布陽和冀赦天下改  
至德三載為乾元元年自二月五日已前大辟已下罪  
無輕重常赦所不免者咸赦除之其兩京文武官應三  
司先推勘者本罪中遞減一等處分其合放者三司具  
條件奏聞自開元以來將相大臣非反逆及犯名教枉

法賊罪者流死許其家人以禮收葬其陷在賊境為其  
殺戮未經追贈者據本官追贈公主及嗣王郡王郡主  
縣主等已上親被逆賊殺害者各與子孫一人官使瘞  
藏失骸骨者令招魂葬身歿王事者三品已上各與追  
贈仍各與一子官五品已上一子出身六品已下量事  
追贈其元從聖皇天帝至成都府之武官五品已上宜  
與一子官六品以下超資進改聖皇至成都府後到官  
及靈州寧州首末扈從三品已上與一子官五品已上



放一子出身情願迴授周親及近親者亦聽六品已下  
量與轉改鳳翔府已歸順前者普恩外加一階車駕出  
城後任官潛藏不仕逆賊即與處分開元功臣普恩外  
賜爵一級身亡歿者與子孫一人加一階其諸道節度  
下將士三品已上與一子官六品已上放一子出身六  
品已下量與轉改勲業高者各委本使奏聞諸道留後  
將士普恩外賜勲三轉自開元以來宰輔之家不為逆  
賊所汚者與子一人官自賊陷兩京文武常叅官及諸

州刺史有絕脰仰藥不事叛人為衆所知者量加優贈  
有脫身賊庭妻子被屠戮者委所在勘會聞奏其天下  
孝義門各與一子官委採訪使具名聞奏量文武處分  
其左降官非反逆緣坐及犯惡逆名教枉法強盜賊如  
有親年八十已上及疾患在床枕者不堪扶持更無兄  
弟者許其停官終養其流人亦准此自今以後應以鑒  
術入仕者同明法例處分其天下百姓今年租庸並放  
免其百司及府縣諸色雜供各宜減半其雜役非切要

者一切並停其天下州縣有遭逆賊攻擊堅守不下竟以獲全其官人百姓中有誠効灼然為衆所知者宜令本道使按驗奏聞據狀迹酬其官賞身亡歿者重加褒贈有父母存者仍與一官及邑號無父母者與一子官有一家丁壯盡被屠害者其父母妻子仍令州縣以官物賑恤并量造屋宇使得安存其州因城陷被殺戮者殘毀者委本道使勘責取實各量免其三二年租賦自寇逆以來有匹夫匹婦節義可稱者並旌表其閭墓其

流亡戶復業者委本道使與刺史勾當賑給並與種子  
犂牛仍免三年租賦内外文武官三品以上各賜爵一  
級四品以上及四方通表使各加一階五品已下有父  
歿者各賜勲兩轉其刺史上佐錄事叅軍縣令委中書  
門下速於諸色人中精加訪擇補擬判司丞已下宜令  
所由先於兩京有潛藏不事逆賊及故託疾病官中簡  
擇資考深才堪者詮注續發遣皇五等已上親及九廟  
子孫有才學政理委宗正等簡擇聞薦其有任偽官及

掌兵馬軍將能即來還各還本官仍別優賞其左降官諸色流移配隸安置罰鎮効力之類亡官失爵解退後放歸田里及安祿山支黨緣坐不在免限李林甫王鉞楊國忠等一房去年十二月十五日制後所犯並准前制處分

廣德元年冊尊號赦

惟高祖太宗敷大德於天下覆載之內湛恩茂育累聖同道康乂兆人寶位重光深其德澤被服漸漬洽於生

靈者百五十年之間兵不作而刑將措矣自寇虐橫厲  
山東不開釁起渠魁毒流區宇三軍七萃之士豪傑忠  
良之徒制在風波遭其驅劫由是干戈不息狂賊實煩  
哀我人斯並罹灾患憫茲有犯無罪萬方朕上戴皇天  
下臨黔首奉先聖之成命集一切之大勲元惡既除羣  
生思又是欲鏡清六合綱決八紘庶齊大道之時克復  
太平之理至化猶鬱兵嚴初解百辟卿士中外重臣並  
進昌言請上徽號曰寶應元聖文武孝皇帝朕涉道日

寡慙德良多恐阻樂推之心自增神器之重俯膺典冊  
敬受鴻名便欲謁報昊天展事郊廟又以孟秋多稼垂  
及西成王畿之間人實勞止輟茲大禮式候玄冬切為  
踰年改元之制續承鴻業敢廢舊章博採羣公之議乃  
貞協用之紀其實應二年改為廣德元年爰屬履端乃  
弘肆青救茲湯火俾雲行而雨施滌其瑕穢將玉振而  
金聲宜廣更始之恩用明嚮勸之福可大赦天下自廣  
德元年七月十一日昧爽已前大辟罪已下罪無輕重

已發覺未發覺已結正未結正見繫囚徒常赦所不免者咸赦除之左降官即量移近處亡官失爵各與收叙諸色流人罰鎮効力安置配隸等一切放還其安祿山史朝義親族應在諸道一切原免並無所問天下所有諸色結聚羌渾党項等但能悔過自陳各歸生業一切並捨其罪其中有頭首能勸率並束手來者並加官賞仍令本道防禦使本管刺史縣令分明曉諭所有到者各錄奏諸道百姓逋租懸調及一切欠負官物等自寶



應元年十二月三十日已前並放免一戶之中有三丁  
放一丁庸調地稅依舊每畝稅二升天下男子宜二十  
五成丁五十五入老應徵租稅刺史縣令等據見在戶  
徵科其逃亡死絕者不得虛擲隣保河北百姓復三年  
應是回紇行營經歷處免今年租稅内外文武三品已  
上賜爵一級四品已下加一階各賜勲兩轉天下兵馬  
元帥雍王智謀夙成忠孝純至恭行討伐親總元戎撫  
外藩以仁訓羣帥以義班師獻捷勲茂武成宜兼尚書

令加實封二千戶廻紇可汗冊為頡咄登密施舍俱綠  
英義建功毗伽可汗可敦冊為娑墨光親農華毗伽可  
敦可汗可敦及左右殺内外宰相已下共加實封二萬  
戶令御史大夫王翊持節就衙帳禮冊左右殺胡祿都  
督並封為王諸部督並封國公河北副元帥懷恩宜無  
太保仍與一子二品官一子四品官并階更加實封五  
百戶河南副元帥光弼與一子三品官并階加實封三  
百戶幽州節度懷仙與一子三品官并階加實封二百

戶李抱玉郭英乂辛雲京侯希逸田神功孫志直白孝  
德令狐彰並各與一子三品官并階加實封二百戶李  
寶臣薛嵩田承嗣張獻誠等各與一子五品官并階加  
實封二百戶魚朝恩寄崇師律程元振勲高佐命各加  
實封二百戶仍與一子五品官并階僕固瑒高彥崇渾  
日進李建義李光逸楊崇先李懷光張如岳白元光溫  
如雅拓跋澄泌高暉盧欽友成惟良曹楚玉等各與一  
子五品官加實封一百戶仍各賜鉄券以名藏太廟畫

像於凌煙之閣并冠難已來將相勲業高者其名籍圖  
畫亦准此子儀與一子三品官并階加實封二百戶苗  
晉卿劉晏裴遵慶元載各與一子四品官并階加實封  
一百戶儀王及彭王已下男未有官者並准舊例與官  
及封永穆并長樂已下長公主及郡縣主嗣王等各與  
一子官皇親五品已上諸親三等已上各與一子出身  
二王後各與一子官諸道節度使及立功將士其父見  
在無官者依子文武與官已歿者追贈陣亡將士襲父

官爵河南河北有懷材抱器安貞守節素在丘園不仕  
為衆所知委所在長官具名聞薦應援偽官等並昭洗  
矜才宥過宜有甄拔委所由勘會本官名銜資歷聞奏  
量才處分文武正貲常叅官并諸州刺史父母無官邑  
號者宜與致仕官及邑號贈者更與改贈刺史縣令已  
後改轉刺史三年為限縣令四年為限貲外及攝試官  
一切不得釐務諫官每月一上封事無所迴避河北偽  
度僧尼道士女冠並與改正度天下刑獄須大理正卿

斷刑部詳覆不得中書門下便即處分諸色人中有孝  
悌力田經術通博文詞雅麗政理優長本州各以名薦

唐大詔令集卷九

欽定四庫全書

唐大詔令集卷十

宋 宋敏求 編

帝王

冊尊號赦下

元和十四年冊尊號赦

長慶元年冊尊號赦

寶曆元年冊尊號赦



會昌元年冊尊號赦

會昌五年冊尊號赦

大中二年冊尊號赦

乾符四年冊尊號德音

痊復

太上皇康復詔

疾愈德音

太和八年疾愈德音

咸通八年痊復救卹百姓僧尼勅

冊尊號赦下

元和十四年冊尊號赦

朕聞惟人戴后因事必極於推尊惟辟奉天有善必歸  
於讓德式敷景化以荅玄功居有勞謙之思進多滿假  
之懼緬自遠古何嘗不由是而致理焉朕獲纘睿圖祇  
膺神器上奉大祭下安羣生恭已臨軒兢懷馭朽志欲  
周於四海念常切於一夫旰食宵興惟恐失墜運屬休

泰時丁小康方隅廓清氛祲銷盭斯乃上荷乾坤之垂  
祐宗社之降靈下賴卿士之協心戎臣之宣力端拱嚮  
道推誠任能豈予寡昧用集丕績況至化猶鬱勤憂未  
寧而中外諸臣文武多士累陳懇疏並進昌言願獻鴻  
名以增虛美抑衆心而率籲轉切顧眇身而內愧靡安  
乃撰吉辰爰受典冊禋告於清廟虔聞於昊天當茲盛  
儀夕惕增勵於戲朕自御極再加景號在徽章而孔備  
諒浮實而多慙宜因行慶之辰誕布惟新之澤與物咸

遂永享於休可大赦天下自元和十四年七月十三日昧爽已前大辟罪已下咸赦除之惟故殺人及官典犯贓不在此限左降官量移近處已經量移者更與量移如復資者即任便赴選集亡官失爵放歸不齒者量力收叙前資見任官因瑕累未經錄用并左降官事情可恕才行足稱者宜簡拔獎用淄青舊管內官吏等將士百姓等縱有跡同惡逆掛涉流言事在往時一切不問京畿今年秋稅青苗及榷酒錢每貫量放四百文從元

和五年至十年已前諸縣百姓欠負錢物斛斗等委京兆府踈理減放淮南浙江東道宣歙江南西道湖南福建山東南道荆南等九道今年秋稅錢合上供者每貫量與減放度支鹽鐵戶部應有逋懸並委本司踈理具可放數聞奏比來州縣並不定戶貧富變易遂成不均前後頻有制勅長吏不盡遵守今宜三年一定必使均平内外文武見任及致仕各官三品已上賜爵一級四品已下加一階仍賜勲兩轉神策六軍金吾皇城威遠

諸道將士經淮西淄青兩度立功者更賜勳兩轉二王  
三恪及文宣公神策六軍金吾皇城威遠等諸軍應在  
城內蕃客並節級賜物侍中韓弘讀冊官崔羣讀寶  
官皇甫鏐並各加一階已至三品者賜爵二級撰冊文  
官崔羣與一子正貲官其餘應職掌行事加階賜勳有  
差故尚父子儀贈太尉秀實及張巡許遠南霽雲顏真  
卿杲卿子孫各與官及出身實應興元功臣各賜勳爵  
天下諸色人有賢良方正能直言極諫博通墳典達於

教化軍謀宏遠堪任將帥詳明政術可以理人者委內  
外官各舉所知當親自策試中書門下選黜陟使分巡  
天下百姓高年者頒賜有差

長慶元年冊尊號赦

元稹

我高祖太宗化隋為唐奄宅區夏包舉四海全付子孫  
其何事哉彼昏盈而我勞勩也明皇承之能大其業六  
戎八蠻罔不貢奉由是庶尹弛政庶吏弛刑視人不勤  
視盜不謹燕寇勃起洞無藩籬六十有七年兵革大試

其何事哉據易安而怠漸萌也逮我聖父勤身披攘斬斷誅  
除天下略定曾是幽冀賜予懷來荷賴皇靈丕訓不墜環歲之  
內二方平寧粵予何功時帝之力而卿大夫猥以大號加予眇  
身讓於四三益甚其請皇太后始聞其事歡然慰心慈旨丕  
臨臣誠上迫祇受典禮懔乎予懷尚念昔者七十二君莫不升  
中慶成自以為堯舜莫已若也然而不為堯舜之行者來  
代無傳焉朕嘗推是為心不欲名浮于實今卿大夫謂我為文  
武孝德矣其將何道以匡予予其業業兢兢日慎一日慕



陶堯虞舜之行以自勉思文武憲章之道以自勸予苟  
不思無忘納誨於戲溢美之名既不克讓潤物之澤夫  
何愛焉可大赦天下自長慶元年七月十八日昧爽已  
前罪無輕重咸赦除之惟故殺人并官典犯賊不在此  
限應左降官及流人未經量移者宜與量移近處有左  
降官流人本因犯賊得罪者宜依今年正月三日制處  
分京畿諸縣及度支鹽鐵戶部負欠各疎理放免有差  
應經戰陣之處所在州縣收瘞遺骸仍量事與槥積兼

以禮致祭李師道吳元濟自絕於天並從誅滅念其祖父嘗事先朝墳墓所在並不得令人擅有毀廢愛人本於省賦雖在必輕國用出於地財又安可闕今淮蔡并山東率三十餘州約數千里頒賜或踰於鉅萬給復有至於連年應河北等州給復限滿處置宜委所在長吏審詳墾田并桑見定數均輸稅賦兼濟公私每定稅訖具所增加申奏其諸道定戶宜委觀察使刺史必加審實務使均平京兆府亦宜准此其百司職田在京畿諸縣

者訪聞本地多被所由侵隱抑令貧戶佃食蒿荒百姓  
流亡半在於此宜委京兆府勘會均配務使公平其京  
兆百姓屬諸軍諸使者宜令各具挾名勅下京兆府一  
戶之內除已屬軍使餘父兄子弟據令式年幾合入色  
役者並令京兆府明立籍簿普同百姓一例差遣頻年  
已有制勅處分委京兆府舉明舊章條件聞奏刑獄所  
繫理道最切如聞比來多有稽滯一拘囹圄動變炎涼  
自今以後宜令御史臺切加訪察每季差御史巡囚事

涉情故或斷結不當有失政刑具事由聞奏其天下州縣並委御史臺并出使郎官御史兼諸道巡院切加察訪近邊所置和糴皆給實價如聞頃來積弊頗甚美利盡歸於主掌善價不及于村閭或虛招以奉於強家或廣僦用資於游客若不嚴約弊何可除宜委度支精擇京西京北應供糧軍并和糴院官并營田水陸運使切加訪察仍作條疏檢轄速具奏聞應停諸道年終勾并不許刺史上使并錄事叅軍不得擅離本州委御史臺

切加糾舉内外文武見任并致仕官賜官爵有差神策  
六軍金吾威遠皇城將士普恩之外各賜勲三轉大長  
公主公主嗣王郡主縣主神策六軍金吾威遠皇城等  
諸軍將士統軍以下兼將士等長行立仗及守本軍本  
營者各賜物有差鴻臚禮賓院應在城內蕃客等並節  
級賜物陰山貴女來迓天孫會王明庭克觀盛典念吾  
妹之將遠於禮賓而宜加其迴紇公主別有賜物攝侍  
中讀寶戶部侍郎平章事杜元穎中書侍郎平章事崔

植各加一階撰冊文官與一子正員官奉冊奉寶綬書  
玉冊書寶官各加兩階進寶綬進冊中進中嚴外辨禮  
習儀贊導押冊押寶綬昇寶冊官各加一階其餘應職  
掌行事官并寫制書官太常修撰儀注禮官并內定行  
事中使三品已上各賜爵一級四品已下加一階仍並  
賜勲兩轉鑄造玉冊并填金事造寶裝寶官等各賜五  
十段尊師重傅有國常經李逢吉韋綬薛倣丁公著等  
普恩之外各加一階如已至三品四品者賜爵一級天

下百姓九十已上者委所在長吏量加存卹孝子順孫  
義夫節婦先以旌表者亦量加優恤五岳四瀆名山大  
川并自古聖帝明王忠臣烈士各令所在以禮致祭

寶曆元年冊尊號赦

門下朕聞奉天地之大統必酌於人心荷祖宗之誠訓  
必參於國典顧惟眇身守任重器道未能被物德不足  
蓄身賴于宗公碩老輔導承弼享祧奉鬯熏燎告玄履  
歷正元敷施大號庶萬方咸若四表穆然皇祖披攘之

基列聖焦勞之業恬焉而有泰焉而居晝以度心夜以  
省已其何德以堪之方將法乾以行健體咸而致和執  
冲以固高守約以持滿而文武百辟章奏四上以為人  
心不可以曲讓國典不可以矯違亦用慰於太皇太后  
皇太后之意屈而後俞諒非獲已豈不以子非生知欲  
以徽稱懿號誘掖勸慕之乎將使循名而勉其實力實  
而應其名乎然則予方且以為韋絃方且以為箴誥懋  
於皇極庶無尤違是宜與物同利惟新大澤可大赦天



下自寶曆元年四月二十二日昧爽已前大辟罪已下  
已發覺未發覺已結正未結正繫囚見徒罪無輕重咸  
赦除之惟故殺人及官典犯賊不在此限

會昌二年冊尊號赦

門下昔我高祖太宗始造區夏闢乾坤以覆載揭日月  
以照臨盛德耿光格于上下昊天有成命我二后受之  
列聖丕圖光大其緒文綏武靖奕葉連枝逮予纘修罔  
敢失墜誠欲追蹤往昔貽範將來陶末俗於至和返太

撲於已散而道不足以居域中之大文不足以成天下  
之化恭已南面夙興夕思遐想古理歉然予懷至於嗣  
歲豐穰寰海康靜妖沴滅息華夷大同茲寶鑒祐自天  
匡救在下諒非已出安敢自多而三台百辟陳忠瀝懇  
加我大號其何以堪謂予守文宜述先志抑而不行者  
三請確而不拔者羣誠豈貪在已之名姑念從人之欲  
祇膺典冊良深惕厲於戲顏子匹夫也猶曰舜何人也  
矧有其位行其教化而不思齊其道也尚念交修俾克

用人今維夏長養之時動植之物莫不自遂思有以導  
迎和氣生活吾民是用稽犧爻之作解法虞書之肆赦  
推恩宥過與物同休可大赦天下自會昌二年四月二  
十三日昧爽已前大辟罪已下已發覺未發覺已結正  
未結正繫囚見徒罪無輕重咸赦除之惟犯十惡叛逆  
已上故殺人及官典犯贓不在此限

會昌五年冊尊號赦

門下王者事帝必嚴禋祀之容臣下歸功爰極推崇之

義既膺顯號式展盛儀因時布和順歲更始前聖垂範  
逮予是遵矧以眇身幸逢昌運雖履冰惟懼而涉道未  
周繫我輔臣洎茲列岳內盡交修之志外分共理之憂  
乃者敵衆乖離部族款附收帝子於毳裘之所致名王  
為冠帶之臣堅昆來朝不遠萬里蠻貊向化克同九州  
重以上黨狂童竊襲叛逆問罪之師既集元兇之首遂  
梟廓清亂風洗滌污俗翦逆弁而故都底定竄摩尼而  
壞法永除由是退惡進賢化行令舉刑奸賊之吏破黷

貨之家此皆宗社降靈助成時政豈朕涼德獨擅厥功  
而中外諸臣文武多士累陳懇疏再舉鴻名辭不獲從  
被此虛美是用虔告清廟明禋上玄煙燎所升靈貺如  
答既展郊禮重中國經宜因行慶之辰誕布維新之令  
同我景福永孚於休可大赦天下自會昌五年正月三  
日昧爽已前大辟罪已下罪無輕重已發覺未發覺已  
結正未結正繫囚見徒常赦所不免者咸赦除之

大中二年冊尊號赦

門下我國家披皇圖以立極執文象以升中睿嗣神宗  
重熙累盛逮予稽古考聖紹復中興洗滌宿氛廓開昌  
運天命不易賜予元符荷祖宗之耿光致寰瀛之小泰  
干戈載戢風雨順時北狄來賓西戎効款豈予菲薄沆  
此肅清皆中外元寮文武多士同心協贊而使之然益  
用兢慙以戒盈滿而乃累陳丹懇願上鴻名牢讓不從  
滛陳彌切於戲昔賢有云舜何人也我何人也苟或讓  
之不遂予亦敢不思齊今百執事謂予曰聖敬敢忘湯

武日躋之詩謂予曰文思敢忘放勲欽明之典謂予曰  
和武敢忘保大之功謂予曰光孝敢忘繼志之義以是  
自勉庶無悔焉浮實之名既不獲已乘春之澤當務惟  
新可大赦天下自大中二年正月三日昧爽已前大辟  
罪已下已發覺未發覺已結正未結正繫囚見徒罪無  
輕重咸赦除之惟犯十惡五逆已上故殺人及官典犯  
贓不在此限

乾符四年冊尊號德音

天地運無私之道以遂羣生帝王宏在宥之仁是章含  
垢得不廣沾沛澤昭洽寰區爰施解網之恩用布垂衣  
之化朕君臨大寶子育含靈前歲中外臣僚藩方將帥  
獻我徽號詢於典章雖云前赦不遥既受鴻名咸施慶  
澤稟列聖之法嗣致兆人之勸康然以赦宥恐頻變通  
宜審權停舊典再及新春每念貶降遐荒遷流裔土傾  
心望闕延頸祈哀繫於朕懷常深惻憫宜順陽和之候  
追行盪滌之恩自乾符四年正月五日已前京畿及天



下州府大辟罪已下見禁囚徒各委長吏遞減二等限  
五日決遣唯十惡五逆故殺人及官典犯入已贓持刀  
行劫合造毒藥不在此限於戲朕居億兆之上於今四  
年兢兢業業如履冰馭朽苟有闕教道可致時雍未嘗  
不更自勞心尤思致理况允契羣臣之望欽承列聖之  
規特降鴻恩獲遵彝典今則已覃惠澤俾洽生成復遇  
陽春同均煦育宣布中外深體朕懷

痊復

太上皇康復詔

書不云乎一人有慶兆民賴之朕虔奉大安愛敬崇極  
永言之養祇慄斯在近日聖躬違豫寢膳有虧憂懼在  
懷不遑寧處博求醫術備盡蠲療祈告明靈具陳懇篤  
上玄降福遂蒙昭祐應時康愈萬福咸宜喜幸之隆實  
兼家國思班愷樂洽于卿士然而尚齒崇孝德教所先  
饗飮是加義超常等諸州都督刺史及文武官人老人  
八十已上并孝子旌表門閭者並宜節級賜物以申饗

宴庶使萬國之內同此歡心施於四海皆知朕意

貞觀四年

七月

疾愈德音

朕遐思三古旁考百王邁德彰仁在於兢慎故詩稱翼翼易羨乾乾惟此之格言豈忘於終日況天地之仁莫先於利物朕乃者膳飲非適興居不時風霜所侵遘厲瘡疾賴上玄降鑒列聖垂休尋克有瘳至於安節深慙慎德重切貽憂爰因康復之初式表兢勤之至況江淮

旱歉滑鄆水灾方念恤人寧忘約已應緣御服及器用  
在淮南浙西宣歙等道各供進者并端午降誕常例進  
獻等一切權停其諸道每年准旨條合貢者委度支商  
量疏理如非切要涉於冗廢者一切停進夫適情悅目  
肆巧雕文翫好雖充農桑實蠹朕將齋服省用每念黎  
元應諸道除常貢外不得別進翫好之物近日諸道多  
奏祥瑞且休徵所感靈跡所昭必驗祥經應玄化自今  
已後除合准式申奏外餘一切不得妄有進獻虛為煩

費卑宮菲食常遵大禹之心馳騁畋遊每奉玄元之誠  
朕勞思惜費恭念好生將欲濟人期於尅己每日供御  
及供宮內食料等一物已上各委本司商量節減仍具  
所收費用數速分析聞奏當付度支管計以添充經用  
五坊鷹狗之類量留充備蒐狩之外一切盡放其淮南  
等道當臨遣使臣別有處分於戲天鑒在上敢不嚴恭  
人視在下敢不兢畏既驗有喜之兆永懷無逸之規凡

在中外宜表朕意

長慶二  
年二月

大和八年疾愈德音

朕祇若天命，續承睿圖，正統紀以清庶，方序彝倫，以貞  
百度，慄慄寅畏於茲九年，雖儉已飭躬，推誠育物，懼有  
未至，不遑安寧，屬節氣交時，疾恙攸體，列聖垂祐，涉旬  
復初，既上慶於兩宮，宜覃恩於兆姓，庶與寰宇同茲福  
祥。自大和八年二月九日昧爽已前，天下應犯死罪，降  
徒流已下罪，通減一等。唯官典犯賊及諸色人所由破  
用官物故殺人十惡等罪，不在此限。左降官流入宜准。

去年八月十九日勅即與處分為政之要必在去煩厚下之恩莫先已責應度支戶部鹽鐵積欠錢物或因繫多年資產已盡或本身淪沒展轉攤徵簿書之中虛有名數固圉之下常積滯寃言念于茲所當矜恤其度支戶部鹽鐵應有懸欠委本司具可徵放數條流聞奏不得容有奸濫在京諸司使食利錢已納利計五倍已上者本利並放其有攤徵保人納利計兩倍已上者其本利亦放免京邑之內本無摧酷屬貞元用兵之後費用

稍廣始定店戶等第令其納權况萬方所聚私釀至多  
禁令既不可施推利自無所入徒立課額殊非惠人其  
長安萬年兩縣見徵推錢一萬五千一貫八百文若先  
欠者並宜放免其推酒錢起今亦宜停比者滄寇干紀  
稽誅數年諸道興師累獻戎捷時方討叛難議釋縲免  
死戍邊已有恩貸今滄州一道久被朝章念其懷土之  
心必有向隅之嘆俾之遂性用洽優恩其諸道所送滄  
州將健配流及邊鎮營田役使者並委本道據見在人



放歸本管如有已効軍職及自有生業不願去者亦任  
便住董昌齡自邕州累平溪洞兵威所向首惡皆擒言  
念蒼生無非赤子況在荒徼尤當撫循其溪洞如有未  
歸附者向後非因侵擾更不用進討仍加存撫各使懷  
安所獲黃洞百姓並分配側近州縣令自營生不得沒  
為奴婢將賞充給如元是奴婢者即任充賞南海蕃舶  
本以慕化而來固在接以恩仁使其感悅如聞比年長  
吏多務徵求嗟怨之聲達於殊俗況朕方寶勤儉豈愛

遐琛深慮遠人未安率稅猶重思有矜恤以示綏懷其  
嶺南福建及揚州蕃客宜委節度觀察使除船脚收市  
進奉外任其來往自為交易不得重加率稅天下諸州  
府如有寬滯未申宜委御史臺及出使郎官察訪聞奏  
朕百靈所祐獲遂痊和虔奉神休敢忘昭報其五岳四  
瀆天下名山大川各委所在長吏致祭仍加豐潔以副  
精誠朕以寡德上承丕構宗社流慶玄穹叶靈徽恙懋  
和旋就康復渥澤恩及于人瘼敬戒先自於朕躬俾我

華夷共歡富壽中外臣庶宜體予懷

咸通八年痊復救恤百姓僧尼勅

勅朕俾寒暑致疾綿滯經時今旬朔之間寢膳已復蒙  
天地保佑宗社寵靈既疾痛之有瘳念被羸之無告為  
之父母得不憫傷慮赦令之或頻則奸人之得計倘恩  
惠之遠布冀窮氓之稍蘇應天下百姓僧尼道士女冠  
等有年七十已上疾病癥瘕委頓牀榻者宜各賜絹兩  
匹在軍旅行陣經敵傷害手足眼目不能營生亦各賜

絹兩匹應州縣病坊貧兒多處賜米十石或數少處即  
七石五石三石其病坊據元勅各有本利錢委所在刺  
史錄事叅軍縣令糾勘兼差有道人專勾當三年  
一替如遇風雪之時病者不能求丐即取本坊利錢市  
米為粥均給饑乏如疾病可救即與市藥理療其所用  
絹米等且以戶部屬省錢物充速具申奏候如定數即  
以藩鎮所進賀疾愈物支還所司此勅到仰所在州縣  
寫錄勅榜於州縣門并坊市村閭要路其州縣所給卹

絹米恐下吏之所隱欺仍委刺史縣令設法頒布不得  
令不到本身所在給卹之後一一分析聞奏俾令速濟  
疾病稱朕意焉

咸通八年十一月六日

唐大詔令集卷十

欽定四庫全書

唐大詔令集卷十一

宋 宋敏求 編

帝王

遺詔上

神堯遺詔

太宗遺詔

天帝遺詔

肅宗遺詔

代宗遺詔

德宗遺詔

憲宗遺詔

穆宗遺詔

遺詔上

神堯遺詔

嗚呼夫受命終畢人之大倫修短之所共同聖賢之所不

免朕往逢喪亂思濟黎元櫛風沐雨東征西伐克平宇  
內從此樂推遂膺景命恭承寶厯但蒙犯矢石羈乘戎  
旅久厭干戈常思閑逸是以拂衣高謝歸老櫟陽爰委  
萬機屬之才子所授得人遐邇寧輯四海清宴八表來  
庭養志怡神於今十載但去秋已來夙疾咸發自爾彌  
留至於大漸皓首歸全斯何恨矣洮穎憑几略陳素志  
朕每覽漢文遺詔慙歎焉以為當今之世咸嘉生而  
惡死厚葬而破業重服以傷生吾甚不取且朕既不德



無以佐百姓今崩又使重服久臨以懼寒暑之數以重  
吾之不德謂天下何吏民令到出臨三日皆釋服無禁  
嫁娶飲酒食肉此豈非深達天命哀矜百姓者歟又魏  
文終制亦有可取朕雖德愧古人豈忘景行屬纊之後  
三日便殮文武官人三品已下三日朝晡哭臨十五舉  
音事訖便出四品已上臨於朝堂殿中當臨者非朝夕  
臨時無得擅哭其方鎮岳牧在任官人各於治所舉哀  
三日且今王師四討軍機急速小殮既竟嗣子宜於別

所視事軍國大事不得停闕尋常閒務任之有司其服  
輕重悉從漢制以日易月於事為宜其園陵制度務從  
儉約斟酌漢魏以為規矩百辟卿士孝子忠臣送往事  
居勿違朕意焉

貞觀九年  
五月六日

### 太宗遺詔

夫天命之重綠錯奉其圖書天子之尊赤縣先其司牧  
而功無造化橋山之樹已陰業致昇平蒼梧之駕方遠  
至於平寇亂安黎元灑洪災攘大患黃帝之五十三戰

商湯之二十七征以此申威曾何足筭昔者亂階斯永  
禍鍾隋李罄宇凝氛暄昏辰象綿區作梗搖蕩江河朕  
拂衣於舞象之年袖劍於斬蛇之地雖復妖干王莽戮  
首輓車兗百虫尤囂尸軍鼓垂文暢於炎野餘勇澄於  
斗極前王不闢之土悉請衣冠前史不載之鄉並為州  
縣再維地軸更張乾絡禮義溢於寰瀛菽粟同於水火  
破舟船於靈沼收干戈於武庫辛李衛霍之將咸分土  
宇縉紳廊廟之材共垂帶綬至於比屋黎元闕河遺老

或贏金帛或賚倉儲朕於天下士大夫可謂無負矣朕  
於天下蒼生可謂安養矣自櫛風沐雨遂成弭沴憂勞  
庶政更起沉疴况乃漢苦周勤禹偏克腊以矜百姓之  
所致也道存物往人理同歸掩乎玄泉夫亦何恨矣皇  
太子某大孝通神自天生德累經監撫熟達機務凡厥  
百僚羣公卿士送往事居無違朕意屬續之後七日使  
殯宗社存焉不可無主皇太子即於柩前即皇帝位依  
周漢舊制軍國大事不可停闕尋常閑務任之有司文

武官人三品已上並三日朝晡哭臨十五舉音事畢便  
出四品已下臨於朝堂其殿中當臨者非朝夕臨無得  
擅哭諸王為都督刺史任者並來奔喪漢王萊王不在  
來限其方鎮岳牧在任官人各於任所舉哀三日其服  
紀輕重宜依漢制以日易月園陵制度務從儉約昔者  
霸陵不掘則朕意焉遼東行事並停太原元從人見在  
者各賜勲官一級諸營作土木之功並宜停斷

貞觀二十三年

天帝遺詔

朕聞皇極者天下之至公神器者域中之大寶自非乾坤幽贊厯數在躬則鳳邸不易而臨龍圖難可輒御所以滎河綠錯彰得一之符溫洛丹書著通三之表緬稽前古期道同歸朕之聖祖神宗降皇虹而稟樞電乘時撫運逢海沸而屬山鳴濡足橫流極蒼生之已溺援手四岳救赤縣之將焚重稱九寰止麟鬪而清日月再安八極息龍戰而蕩風波自彼迄今六十六載黎元無烽

柝之警區寓恣耕鑿之歡育子長孫擊壤鼓腹遐邇交  
泰誰之力歟朕以眇身嗣膺鴻緒欽若穹昊肅雍清廟  
顧諟明命載迪彝倫嘉與賢士大夫勵精為政勗已想  
蛟冰之懼為善慕難鳴之懃幸戎夏乂安中外禔福亘  
月竈以覃正朔匝日域而混車書端拱無虞垂衣有截  
其天意也豈人事乎每導俗匡時既弘之以禮讓恤刑  
薄罰復躋之於仁壽聞九農之或爽則虧膳以共其憂  
見一物之有違則撤樂以同其感斯亦備諸耳目非假

一二言也憂勤之至庶有感於明靈亭育之懷謂無負  
於黔庶永言薄德邁疾彌留徃屬先聖初崩遂以哀毀  
染疾久嬰風療疾與年侵近者以來忽焉大漸翌日之  
瘳難冀賜年之福罕再但存亡者人之晦明生死者物  
之朝夕常情所滯唯聖能通脫屣萬方無足多恨皇太  
子哲握褒履已敦敏徇齊早著天人之範夙表皇帝之  
器凡百王公卿佐各竭乃誠敬保元子克隆大業光我  
七百之基副茲億兆之願既終之後七日便殯天下至



大宗社至重執契承祧不可暫曠皇太子可於樞前即  
皇帝位其服紀輕重宜依漢制以日易月於事為宜園  
陵制度務從節儉軍國大事有不決者兼取天后進止  
諸王各封一百戶公主加五十戶内外文武九品已上  
各加一階三品已下賜爵一級永徽以來入軍年五十  
者並放出軍天下百姓年五十者皆免課役廢萬金芳

桂等宮

弘道元年十  
二月四日

肅宗遺詔

勅帝王享國天命有常大厯傳歸皇綱無易朕幸以涼  
德繼承宗祀在常樂問安之日屬元兇開釁之初南奉  
聖皇北集戎事賴將相同德社稷降靈爰發五原成師  
一旅丕圖克振華夏又寧旰昃之心每勤思於兆庶晨  
昏之禮嘗不匱於庭闈而天禍上延神心未悔正當金  
革罹此凶災遂遭膏肓惟幾大漸及茲理命獲著哲言  
庶安國以保人豈嘉生而惡死審以大計屬於公卿皇  
太子豫仁孝元良聰明齊聖佐成大業能事神祇朕既

彌留可守宗社宜令所司當日具禮於柩前卽皇帝位  
應緣朕喪事制度並准聖皇遺詔其詣道節度使都督  
刺史等並不須赴哀又為兵革未寧郵驛艱弊一切不  
須專使奉慰朕執喪在疚不食葷羶所設饋奠皆須如  
在有違本意神亦不歆其祭祀之禮一切不得宰殺且  
國儲非廣虛費稍多宮掖之間須有釐革所有三宮內  
人宜量事減省及至德已來籍沒家口非切要者並與  
放出諸王院內亦宜准此其文武官僚合須褒賞天下

百姓宜在優矜每當變易之時皆下惟新之命並委皇帝節級處分嗚呼股肱勲臣敬保元子事居送往諒在於茲宣示萬邦宜從朕意

寶應元年四月十八日

### 代宗遺詔

朕以眇身祇奉鴻業不能光宣大訓嘉靖萬邦奉祖宗重熙之德答公卿寅亮之勤旰食宵衣痛心疾首嗚呼天地之理死生常數疾既大漸彌留日臻惟懷永圖嗣守丕業皇太子元良繼明睿哲齊聖宜陟元后保守宗

祧宜令所司當日具禮於柩前即皇帝位仍以司徒兼中書令汾陽郡王子儀攝冢宰其喪儀及山陵制度務從儉約並不得以金銀錦綵為飾天下節度觀察團練等使刺史等並不須赴哀祭祀之禮亦從節儉其三宮內人宜令量事減省諸王院亦宜准此其天下人吏勅到後出臨三日皆釋服無禁婚娶祠祀酒肉其宮殿中當臨者朝夕各十五舉音禮固從宜喪不可久皇帝宜三日而聽政十三日小祥二十五日大祥二十七日而

釋服獲奉宗廟之靈永終天祿所痛不得與佐命勲賢  
庶尹卿士顧命永訣以託萬方內外腹心之臣文武忠  
良之士敬保元子以安家邦嗚呼其聽朕命

大曆十四  
年五月

### 德宗遺詔

朕承八聖之休德荷上天之眷祐嗣守丕訓不敢荒寧  
賴宗廟之靈羣后之力戡定大難以康兆人嚴恭寅畏  
二十有七載今天降疾不興不寤是用審訓宜聽朕言  
皇太子誦元良繼明睿哲齊聖孝友和惠恭敬溫文必

能覲祖宗之耿光紹邦家之大業宜於樞前即皇帝位  
嗚呼朕常奉聖祖玄元清靜之教勵精至道保合太和  
每忘己以愛人豈嘉生而惡死咨爾將相卿士方伯連  
帥其敬保元子永綏萬邦各有叶心同底於道無廢我  
高祖太宗之休命諸道節度使觀察防禦等使及諸州  
刺史等膺鎮守之任有軍旅之事所寄尤重不可暫曠  
不須赴喪以日易月之制宜遵舊典文武官等朝晡哭  
臨十五舉音朕每覽漢史至孝文薄葬之詔未嘗不嘆

息嘉尚緬慕其風園陵制度務從儉約百辟卿士孝子

忠臣送往事居無違朕意

貞元二十二年正月

### 憲宗遺詔

朕以薄德嗣膺寶祚執珪璧以奉九廟垂衣裳以臨萬  
邦十有六年於茲矣賴天地敷祐宗社降靈內有百辟  
多士外有州牧方伯文武並用忠賢叶心以弼予一人  
以康彼兆庶戡剪羣慝廓清九圍方保和平共登仁壽  
而萬務所逼六氣咸侵遘疾有加至於大漸用申顧命



式合典謨皇太子恒天縱睿哲日躋誠敬惟孝惟友克  
寬克仁必能承祖宗之丕訓守邦家之鴻業宜令所司  
具禮於樞前即皇帝位仍以司徒兼中書令弘攝冢宰  
應諸道節度觀察防禦等使及諸州刺史寄任尤切並  
不須赴哀皇帝易月之制皆依舊典文武官等朝晡哭  
臨十五舉音其喪儀及山陵制度務從儉約嗚呼始終  
常禮奚可甚哀漢文至言朕所遵慕咨爾將相洎中外  
腹心爪牙之臣其敬保元子惟懷永圖以續我高祖太

宗之耿光母廢朕命

元和十五年正月

穆宗遺詔

勅朕以眇身嗣守丕構雖勤求理道不敢荒寧而保慎  
或乖邁茲厲疾賴上玄垂祐宗社降靈洎中外庶臣克  
輔寡德服餌願養踰於周星而陽氣熇煩宿恙暴作頃  
刻之際至於彌留伊死生之理必有其分顧託有所予  
何恨焉皇太子湛睿哲溫恭孝友明敏自膺儲貳休德  
日新必能嗣於耿光紹我先業宜令所司備禮於柩前

即皇帝位咨爾卿士洎方伯連帥敬輔元子永綏萬邦  
宜叶乃心用底於道宜令門下侍郎平章事李逢吉攝  
冢宰諸道節度觀察防禦等使及諸州刺史守鎮任重  
戎旅事殷並不須赴喪易月之制宜遵舊典文武官等  
朝晡哭臨十五舉音山陵制度務從儉約無禁婚嫁祭  
祀飲酒食肉其醫官等念其勤瘁亦可矜憐並不須加  
罪宜便釋放將相卿士中外臣寮送往事居無違朕意

長慶四  
年正月



唐大詔令集卷十一

欽定四庫全書

史部

唐大詔令集卷

十二至  
二十七

詳校官編修臣范來宗

編修臣裴謙覆勘

總校官編修臣倉聖脉

校對官學正臣常循

謄錄舉人臣徐元袞

欽定四庫全書

唐大詔令集卷十二

宋 宋敏求 編

帝王

遺詔下

文宗遺詔

武宗遺詔

宣宗遺詔

懿宗遺詔

僖宗遺詔

遺詔

睿宗遺詔

明皇遺詔

順宗遺詔

遺詔下

文宗遺詔



勅朕以寡昧祇承丕業慕貞觀之至化希開元之中興  
十有五年勤勞宵旰雖俗未臻於仁壽而物或近於乂  
寧斯乃羣后叶心豈朕獨致自謂勵精未已治平可期  
誠不感通宿疾重邁藥石無補至於彌留惟懷懿圖宜  
有顧託是用審訓其聽予言皇太弟瀍睿哲明裕孝友  
溫文忠正寬仁博達周敏必能紹祖宗之休烈闡皇王  
之令猷宜於樞前即皇帝位仍以門下侍郎平章事楊  
嗣復攝冢宰軍國務殷豈可久曠以日易月宜遵舊章

皇帝三日而聽政二十七日釋服天下節度觀察防禦等使及監軍諸州刺史職守非輕並不得離任赴哀天下人吏百姓告哀後出臨三日皆釋服無禁婚嫁祠祀飲酒食肉釋服之後無禁舉樂文武官等朝晡臨時皆十五舉音宮中當臨者非時毋得擅哭漢文薄葬朕實慕之奉營山陵務從儉約勿以金銀錦綵緣飾喪具醫術之徒夙夜勞苦深可矜念不須加罪仙韶樂官放歸本司五坊鷹犬並宜解放嗚呼生死常期今古無異子素

知達何足甚哀咨爾將相卿士內外腹心爪牙之臣其  
敬保我太弟輯寧邦家成朕素懷克底於道布告遐邇

咸使聞知

開成五年正月

### 武宗遺詔

朕以寡德祇守丕業恭臨萬宇迨茲七年夙夜憂勤聿  
修大政剷除黠寇通款堅昆誅鎮至闕擒并并部去摩  
尼壞法草釋氏邪風免蠹生人式茲正教漸移時俗庶  
及和平撫育黎元冀成理道行化逾切親政益勤寒暑

所侵厥疾斯邁藥石無補以至大漸皇太叔叔父之親  
賢長之順天資睿哲聖敬日躋光揚祖宗善繼休烈而  
能內睦九族外臨萬機德可以寧庶邦仁可以安百姓  
朕之推擇無愧神明付託得人顧復何恨宜令所司具  
禮輅前即皇帝位仍令太尉平章事德裕攝冢宰軍國  
事重不可暫闕以日易月抑惟舊章皇帝三日而聽政  
二十七日而釋服天下節度觀察防禦使監軍諸州刺  
史職守非輕並不得擅離任赴哀天下人吏百姓告哀

後出臨三日皆釋服無禁婚嫁祠祀飲酒食肉釋服之  
後無禁舉樂文武官朝晡臨時十五舉音宮中當臨者  
非時無得擅哭漢文薄葬嘗所慕之營奉山陵備從儉  
約勿以金銀錦綵緣飾喪具醫人陸行周奪章服及官  
與趙全素任從所適醫官郭玄已下三人釋放依前翰  
林收管五坊鷹犬除留備蒐狩外並解放噫生也有歸  
人之大數修短定分天理惟常雖古聖賢無能免者在  
乎守其道而知其終全其義而歸其正節哀順變存者

不至於傷生委化觀空逝者無勞於哀痛素達此理何足興嗟咨爾元老大臣內外庶位敬奉皇帝保寧邦家布告遐邇咸使知悉

會昌六年三月

宣宗遺詔

詔曰死生之理修短之期古往今來是其常也爰以宗祧所繫嗣續有歸眷彼臣僚宜申顧託我先朝憲宗昭文彰武大聖孝皇帝承十聖之基構翼翼為心平五道之冠讎孜孜不怠雖長慶促運寶曆生奸文宗揚其耿

光武宗付朕鴻業自臨億兆十有四年每思偃武修文  
庶幾聖德要道賴諸良弼罄乎嘉猷或陳無逸之篇或  
進勿休之說東后畢覲西旅繼來克復河湟拓疆三千  
里外告成宗廟雪恥二百年間僅稱太平咸曰丕變顧  
朕寡昧何以堪之今也天命靡常冥數先定與我之齡  
雖盡卜世之年甚長趣彼若歸遇天命而非天釋然何  
慮貽厥孫而有謀皇太子淮羽翼早成春秋已盛既膺  
主鬯克荷承祧宜於樞前即位仍以門下侍郎平章事

令狐綯攝冢宰軍國務殷豈可以久曠以日易月宜遵舊制皇帝三日而聽政二十七日而釋服天下節度觀察防禦等使及監軍諸州刺史職守非輕並不得離任赴哀天下人吏百姓告哀後出臨三日皆釋服無禁婚嫁祠祀飲酒食肉釋服之後無禁舉樂文武官等朝晡臨時皆十五舉音宮中當臨者非時無得擅哭前漢與後魏二文俱從薄葬朕甚慕之營奉山陵稍減常制勿以金銀錦綵緣飾喪具醫術之徒夙夜勞苦深可矜念



不須理問五坊鷹犬並令解放咨爾內外將相爪牙腹  
心之臣其敬保我令子緝寧我邦家成朕素懷克底於  
道布告遐邇咸使聞知

大中十三年八月

### 懿宗遺詔

朕祇事九廟君臨四海夕惕如厲宵分靡寧必求政化  
之源思建大中之道至於懷柔夷貊偃戢干戈皆以德  
綏亦自馴致真清靜之為理庶治平之可臻自秋以來  
忽爾嬰疾坐朝既闕踰旬未瘳六疾斯侵萬幾多曠醫

和無驗以至彌留嗚呼數哉有窮聖賢之所必明於斯  
言是為達節載申顧命式叶典謨皇太子權勾當軍國  
事性稟寬和生知忠孝德包睿哲聖表徇齊必能揚祖  
宗之重光荷邦家之丕構宜令所司具禮於柩前即皇  
帝位以司空門下侍郎平章事韋保衡攝冢宰軍國  
務殷豈可久曠以日易月之制行之自古皇帝宜三日  
而聽政二十七日釋服諸道節度觀察防禦團練等使  
及監軍諸州刺史委寄至重並不得離任赴哀文武常

叅官朝晡臨時十五舉音宮中當臨者非時不得擅哭  
天下人吏百姓告哀後出臨三日皆釋服勿禁食肉飲  
酒婚姻祭祀釋服之後無禁舉樂薄葬之禮宜遵漢魏  
之文其山陵制度切在儉約並不得以金銀錦綉文飾  
喪具五坊鷹犬等除蒐狩外餘並解放其醫官段遂趙  
玘符虔林馬伋等並釋放咨爾將相卿士中外臣僚竭  
力盡忠匡予令嗣送往事居無違朕志布告遐邇咸使

聞知

咸通十四  
年七月

僖宗遺詔

門下朕以冲眇祗荷鴻基每惟祖宗之締構艱難念中外之始終匡輔常同馭朽豈忘納隍而乃重去廟朝兩違陵寢始則黃巢犯闕後則朱玫敷天險阻道望蒼黃播越唯思罪已但念勞人宗社降靈妖氛尋盪六龍回轡萬乘還宮方將陳玉帛以充庭會蠻夷而向闕寧期殷憂成疹宵旰奪神走羣望而靡徵希勿藥而罔効臣僚愛我攻療無遺曾未小瘳以至大漸嗚呼修短定分

古今常期著在格言斯為達理是用降茲訓誓祇聽朕  
言皇太弟知軍國事聽政明敏孝友天資聰明神助龍  
顏表異日角標奇居大麓而風雨不迷輔中興而山河  
備厯寬弘及物清明在躬必能保守宗祧奉承天地內  
撫百姓外鎮四夷實億兆之念同固威靈而是屬付託  
無恨予復何憂宜令所司備禮於樞前即皇帝位仍以  
太保兼侍郎韋昭度攝冢宰軍國事重不可暫闕以  
日易月抑惟舊章皇帝三日而聽政十三日小祥二十

大祥二十七日釋服天下節度觀察防禦等使使監軍諸州刺史  
守職非輕並不得離任赴哀應天下人吏百姓告哀後  
出臨三日皆釋服無禁婚嫁祠祀飲酒食肉釋服之後  
無禁舉樂文武官朝晡臨時十五舉音宮中當臨者非  
時不得擅哭五坊鷹犬除備蒐狩外餘並解放醫官及  
伎術人等晝夜勞苦知無不為宜各安存勿或加罪噫  
朕念兵革以來耕農久廢尤傷畿甸莫不流亡豈堪復  
土之規獨昧吊人之旨且累朝遺制畢及山陵以漢文

薄葬之詞為列聖循常之命約錦繡金銀之飾禁奢華  
雕麗之工皆例作空文而並違先旨今者流離若是痛  
毒堪悲仗百姓即百姓一空捐國用則國用無取不可  
踵從前之計度因此日之生靈俾朕厚顏下見先帝應  
緣山陵事務宜令中外商量比從來每事十分各減六  
七桐棺瓦器朕所慕之況在合晨勿欺大夜咨爾股肱  
重臣内外文武爪牙之士腹心之徒合志同心輔予令

弟布告天下咸使聞知

文德元年三月

睿宗遺誥

蘇頌

誥朕聞古之建皇極承大序者雖創業垂統則至公之器固不可違而居常待終則必定之期固不可易况朕以薄德累承聖緒常願致虛守靖用遂其真至於崇高富貴本非所重故三為天下推三以天下讓蓋從人之欲方御於萬邦知子既明復傳於七廟爰命皇帝寄之司牧觀其體自舜禹以成厥政則朕飄然汾水無負於時何嘗不問寢以侍膳候顏而順色孝已達於神明愛



已無於君父成朕之志何慶如斯然朕頃感舊疾倏焉  
大漸聖賢共爾修短其分古無不歿同謂之歸付託得  
人夫復何恨屬纊之後三日便殯以日易月行之自久  
厚葬傷生可以深誠其喪紀及山陵制度一依漢制故  
事社稷務重皇帝不可諒闇自居小殯之後宜即別處  
視事軍將及岳牧等所在發哀並不須來赴百辟卿士  
孝子忠臣送往事居無違厥意主者施行

開元四年六  
月二十日

### 明皇遺誥

惟天鑒下享年有期惟人奉天獲沒為善予嗣承丕業  
敬守宗祧中暱愉人幾淪大寶賴皇帝撥亂反正戡難  
濟時幸以暮年復茲安養常懼有悔以羞先靈今病既  
於彌留殆將不寤其國務之事非予所圖哀制之間茲  
審遺訓者皇帝不豫厥疾未瘳禮貴適時或無封執宜  
令天下吏人令到出臨三日皆釋服無禁婚娶祠祀飲  
酒音樂其殿中當臨者曉夕各十五舉音禮畢而罷皇  
帝宜三日而聽政十三日小祥二十五日大祥二十七

日而釋服以日易月固有前聞人子之念皆所未忍而艱難之際萬國事殷其葬送之儀尤須儉省特宜裁改無守常規嗚呼萬方勿乖予志

上元元年七月

### 順宗遺誥

朕聞生死者物之大歸修短者人之常分古先哲王明於至道莫不知其終以存義順其變以節哀故存者不至於傷生逝者不至於甚痛謂之達理以貫通喪頃存弱齡即敷清淨逮於近歲又嬰沉痾嘗亦親政益倦於

勤以皇帝天資仁孝日躋聖敬爰釋重負委之康濟而能內睦於九族外勤於萬幾問寢益嚴視膳無曠推此至德以安庶邦朕之知子無愧天下今厥疾大漸不寤不興付託得人顧復何恨四海兆庶亦奚所哀但聖人大孝存乎善繼樞機之重軍國之殷纘而承之不可暫闕以日易月抑惟舊章皇帝宜三日而聽政十三日小祥二十五日大祥二十七日釋服方鎮岳牧不得離任赴哀天下吏人誥至後出臨三日皆釋服無禁嫁娶祠

祀飲酒食肉宮中當臨者朝晡各十五舉音非當臨時  
禁無得擅哭釋服之後勿禁舉樂他不誥中皆以類從  
事伏以宗臨仙寢復土纔於旬邑疲人休功未幾今又  
重勞營奉朕所哀矜況漢魏二文皆著遺令永言景行  
常志夙心其山陵制度務從儉約並不得金銀錦綵為  
飾朕寢疾歲久以至彌留醫藥伎術之人夙夜無懈念  
其盡瘁頗謂極誠必在優容務令得所百辟卿士宣力  
盡忠克申送往之哀宜展事居之禮布告天下明知朕

懷

元和元年正

月十九日

唐大詔令集卷十二